

LA CALANCO DAURADO

Pouèmo

Eugèni MARTIN

Es au bèu mitan de la guerro que nous sian douna lou pres-fa de larga L'Encicloupèdiò prouvençalo. Sènso li malur que nous aclapon, i'a de tèms que l'estampaire aurié fa sourti lou premié voulume de si mecanico. Nous a faugu espera fin-qu'à vuei.

Enjusqu'aro li libre, li broucaduro e lis estùdi de touto meno sourtien coume poudien, un pau de tout caire, tau de faièu mau aclapa.

En foundant L'Encicloupèdiò prouvençalo, nosto toco es de publica dins uno couleicioun unenco, quouro en franchimand, quouro dins un dialèite o dins l'autre de nosto gènto lengo d'O, tout ço qu'arregardo noste païs, soun istòri, sa literaturo emai tout lou rèsto.

Lis autour que nous fisaran sis obro lou regretaran pas. Li souscrivèire nimai. Lis un coume lis autre nous lou saubran à dire dins quàuquis an.

Se lou ped-terrous pèu pas vanta si pòrri, avèn pas lou dre de faire l'apoulougìo de nosto iniciativo. Se saup, pamens, que l'obro entre-presso es grand e bello. Mai, fara-ti flòri? Sara-ti inmourtalo? Acò, nòsti felen auran de lou juja. Falié durbi lou tai; l'avèn fa.

*

* *

La Calanco daurado, recuei de l'egrègi felibre Eugèni Martin es lou premié grèu de nosto biblioutèco.

Fau parti d'aqui, que L'Encicloupèdiò prouvençalo es pas vengudo au mounde pèr valourisa de medioucrita.

Couneissèn trop lou talènt bèn particulié de Mèste Martin: qu saup quant de cop se sian coungousta à la leituro de Soulòmi d'un jour d'estiéu.

Venèn de trouba Martin, emé touto sa forço de bèu pouèto, dins l'obro que vous presentan.

Sa lengo lindo e armouniouso que noun-sai, soun gàubi majour pèr maneja lou parla de si rèire, fan qu'aquéu vertadié païsan a l'ounour de figura lou bèu premié, en plen soulèu de glòri, sus lou lindau de L'Encicloupèdiò prouvençalo.

Pèr si flàmi vers, nosto obro, à nautre, fara chabènço; d'acò n'en sian segur.

Mai, noun es la prefàci que fai la bounta d'un libre, parai, brave Martin!

Es pèr acò que coupan court.

Andriéu FELIX,
Direitour-foundatour
de L'Encicloupèdiò prouvençalo.